

金  
石  
學  
錄

金石學錄卷三

嘉興李遇孫輯

國朝上

欽定西清古鑑四十卷謹案簡明目錄云乾隆十四年奉

勅撰皆即內府度藏古器繪圖列說體例雖仿考古諸圖而援據經典辨別款識一一考證精核無所牽合附會於其間則萬非諸圖所及也

御製重刻石鼓文序謹案乾隆五十五年

高宗純皇帝臨雍講學見石鼓原刻懼其歲久漫漶為立重欄以蔽風雨別選貞石摹勒十鼓之文俾海內士人便於椎拓

御製序從韓愈詩定為宣王時物洋洋

聖謨昭示萬世可以息從前經生家之異議矣

孫承澤著庚子銷夏記內有石刻四卷侍郎富於收藏推賞鑒家議論頗稱博洽孫炯有研山齋珍玩集覽及研山齋雜記二書其於銅器亦有考辨蓋承其遺緒耳濡目染具有淵源耳

黃宗羲著金石要例一卷標三十六例以補蒼崖書之缺其考訂較王止仲更密

曹溶著古林金石表侍郎藏碑之富甲於東南自行塞上始為蒐羅積五年得八百餘本裝界精整有一定之分寸不得稍有參差每冊必手書其籤而校勘之至今人稱為曹籤云

顧炎武著金石文字記六卷又石經考共錄金石文字三百餘種其自序云挾別史傳發揮經典頗有歐趙二錄所未具者非虛語也又著求古錄一卷共碑五十六種每刻必載全文用隸釋之例又潘耒著補遺二十餘條附刻先生金石文記後稼堂受業先生之門於金石亦多所考證

朱彝尊著曝書亭集內四十六卷至五十一卷皆金石題跋考據精鑒與顧氏金石文字記稱抗手繼前賢開後學於兩先生實無愧焉又案先生本有吉金貞石志後併入諸題跋於全集中不復成此書矣又經義考中有石經考曰下舊聞末附石鼓考海昌馬寒中住花山築道古樓貯藏書籍金石

先生為賦君平遺鏡歌及宋拓鐘鼎款識跋新莽  
錢范跋全里曹仲經好集金石文字先生為作吳  
大安寺鐵香爐題名跋北齊少林寺碑跋唐騎都  
尉李君碑跋沈菜畦為藍邨先生子工八分愛金  
石刻先生為作開元太山銘跋馬名思贊又姓朱  
於先生為叔姪曹名曰瑚沈名翼俱受業先生之  
門

吳任臣著十國春秋其於蜀載石經云廣政十四年  
詔勒諸經於石秘書郎張紹文寫毛詩儀禮禮記  
秘書省校書郎孫明古寫周禮國子博士孫逢吉  
寫周易校書郎周德貞寫尚書簡州平泉令張德  
釗寫爾雅字皆精謹

黃虞稷收藏經籍甚富并及石刻說漢石經云漢石經殘碑見於洪氏隸釋者尚書僅五百四十七字視孔安國多十字少二十一字不同者五十五字論語載盍毛包周有無不同之說公羊亦有嚴顏異同而詩則魯故所傳非毛鄭訓故此足貴也

劉凝著石鼓文定本以拓本為主參以薛氏鐘鼎款識其例凡拓本全者用圓圍識之彷彿者無圍拓本所無以薛本補者用方圍併雜採詩文薈萃成書按劉氏定本竹翁未見其書故曰下舊聞不引而舊聞采書目內有趙氏師尹石鼓文考注朱氏茂琬獵碣考異二書

張弢承父致中儲藏鼎盍碑版之富弢尤博學嗜古

究心金石之文後以聲廢而考證彌勤著昭陵六駿贊辨濟州學碑釋文又著瘞霍銘辨親至焦山仰卧而手拓之較宋黃長睿董道所載多得八字所辨較明顧元慶為詳核又有王英亦嘗拓此銘而考之厲樊榭瘞鶴銘句云張王近事僧指說奇險欲動魚龍聽自註云張昭王瑛暴書亭集有焦山剔銘圖為王副使瑛作

馬驢著繹史內宣王中興錄石鼓文并音訓名物訓詁器用門錄古金器六七十種惜無所訂證

傅山謨述未見阮亭先生稱其工分隸及金石篆刻潛邱徵君稱其長於金石遺文之學每與余語窮日繼夜不止并問潛邱金石文字足以正經史之

謫而補其闕始於何代何人因舉七事以對蓋先生為山右老宿孳孳考古所著惜未流傳世間耳王宏撰撰述亦未見先生居華山下為郭允伯後輩即刻其所著金石史以薦舉鴻博至京師所携漢華山廟碑唐貞觀石刻金剛經等皆允伯物一時講金石學者皆宗之惜其著述未顯因與青主先生同列以待訪求

鄭簠著各碑跋構園於金陵城東顏曰灌木樓蒐求漢魏以來金石碑版時與張大風顧與治相考證分隸為國初第一手與竹垞先生先徵士秋錦公稱石交予家及朱氏堂額楹帖俱出其手生平臨漢碑最多必有跋尾予家僅藏臨邛易令曹全



碑一本其跋已刻於觀妙齋金石文字考畧中又  
吳槎客國山碑考錄其天發碑釋後跋惜當時未  
有裒集而存之者能無與青主山史兩先生同一  
慨乎

王士禎以祭告使秦蜀亦留意金石刻著秦蜀驛程  
後記王穉子東西二闕皆有記錄并記後人題字  
頗詳核

姜紹書著韻石齋筆談二卷於金石亦有論說  
萬斯同著石經考一卷執後漢書儒林傳序為古文  
篆隸三體書法以參校一語欲翻一字漢刻三字  
魏刻之素則惑矣後錄唐宗石經較詳於亭林先  
生石經考亦足補其未備爾

閻若璩著潛邱劄記與傅青主論金石學舉七事以對又述顏氏廟碑真卿兄弟七人真卿行六碑稱第七子似誤餘無論說

臧琳著經義雜記三十卷內說隸續載魏石經左傳遺字中有尚書三篇文後段懋堂大令著尚書撰異亦嘗言及竇先生發之也又以熹平石經自洪黃兩家所載亦槩未之見唐張參五經文字上列說文下列石經嗜古之士欲觀中郎遺跡不可不讀因輯錄之又說犧尊云毛傳犧者沙羽飾古義獻沙聲相近毛詩傳為先秦古書二鄭咸所依據後世即出犧牛之尊要不得以此改詩禮之義終是王肅好與鄭難故為異說耳其所論皆有獨見

葉奕苞著金石補錄先生自試鴻博放歸專心著述  
并及金石其搜羅考訂皆有根柢漢隸殘碑自然  
之性百餘字從來不見於著錄惟先生書載之以  
資後人考核亦可見其收穫之富矣

程邃嗜古能識奇字嘗為王子底吏部釋焦山古鼎  
銘辨其可識者七十有八字存其疑者八字不可  
識者七字吏部為長歌述之

鍾淵映與朱竹垞太史共註歐陽文忠五代史太史  
游雲中轉客太原訪沙陀北漢故蹟殘碑斷碣靡  
不摩挲抄撮廣漢亦多所考證見太史谿州銅柱  
記跋

毛先舒著思古堂集石鼓跋從程大昌之說以為成

王時作極為辨核石經亦有考證經義考採之  
葉封著嵩陽石刻集記二卷時官登封知縣錄境內  
古碑而成此書其辨論推為博洽

林侗喜錄金石文嘗携拓工厯唐昭陵陪葬地得英  
公李勣以下十有六碑著來齋金石考三卷錄碑  
二百二十種其說皆有典據弟佶著漢甘泉宮瓦  
圖記並蘭詒堂碑目

顧苓有埴影園鐘鼎款識一冊現藏張叔未家朱竹  
垞檢討稱其精隸書嘗過之山塘偕入骨董肆中  
見鼎彝刀尺款識悉能誦之文從字順每嘆為不  
可及

葉萬著續金石錄用隸釋例多載全文並著其闕字

之數行列之式欲以續趙德父之書然編次無法又多複漏

孔尚任藏建初慮僂尺作漢銅尺記周尺考周尺辨三篇極精核又藏母乙鼎及亞尊等器編入積古齋款識

高士奇雅志好古收獲頗富不獨書畫也藏有秦斤銘一百零三字其拓本為積古齋款識所收

宋犖鑒賞之精推國初第一而有力以羅致之書畫之外兼及金石所藏宋拓西嶽華山廟碑竹垞題跋所謂驚心動魄者也

景日珍著說嵩有金石類一卷

龔翔慶居杭州多收藏築玉玲瓏閣以貯諸物嘗手

拓叔夜鼎銘二十字積古齋取以編入款識近梁山舟先生藏有難形武丁盂馬秋藥先生藏有伯躬父鼎又趙次閑之琛藏有頌壺銘百四十九字即朱竹垞暴書亭集所跋周司成壺銘是也又藏彭姬壺銘十六字二器惜已散去皆為積古齋所收此武林金器故并錄之

楊繩祖究心金石之學嘗跋宋拓夏承碑其碑後為吳門孝廉陸謹庭所藏

周在浚著天發神識碑釋文一卷是碑斷裂頗難辨識雪客合其石貫以鉅鐵重為釋文而以諸家題跋附之

鄭元慶著石柱記箋釋因竹垞太史補舊刻之缺而

芷畦為之牋釋焉太史有序稱其考證詳核廣見博聞洵為不刊之書

顧仲清著孔林漢碑考中村為竹翁高弟愛金石偶客濟邑留官舍購得孔林漢碑七紙州學碑四紙文多剝落署中無金石考諸書對勘逐字揣度註釋稿凡五易而成見自序無刊本

陳奕禧著金石遺文錄十卷漁洋稱其書法晉人於秦漢以來金石文字收弄尤富皆為題跋辨證然綴論唯漢碑稍多唐碑以後十不逢一意在錄文而不全在跋也

陳鵬年著瘞鶴銘考康熙四十六年官鎮江知府募工出石於江中陷之焦山亭壁間其石分而為五

所存七十七字又不全九字其無字處以空石補之益為完善此碑若非文恪安得復顯於世乎汪士鉉著瘞鶴銘考一卷此碑張力臣得字六十九陳滄洲搜石出後存七十七字又不全九字退谷備采昔人之論并引張說而折衷之以陳所出石本為圖列諸卷首彙為此考搜羅極稱詳盡

查慎行勤考訂嘗於馬氏道古樓見宋王復齋所藏鐘鼎款識冊內周叔姬鼎季嬭鼎麻城鼎癸亥父己鬲鼎凡四器古篆為之訂正詮釋字義皆能精當

吳涵石門人康熙三十一年任順天府府丞移李北海書李秀殘碑二礎於文丞相祠作雲麾將軍斷



碑記吳君保護是碑其功甚偉使後人猶得以殘闕摹本共相珍玩朱文藻碧溪文集曾有叙論極稱之

王著著天發神識碑考陽羨國山碑考二種弟槩有天發神識碑補考其所作此碑賦注目為天紀碑非也即補考中亦有誤處

王澐著虛舟題跋竹雲題跋吏部以工書名海內跋尾皆其臨摹古碑帖時所書半以論書法之優劣然史書之闕繆亦皆辨證則又同於歐趙之用心也陳焯亦精考古吏部題跋遺稿賴其搜藏付梓以成完書張文魚金石契中錄其兩畝錢說甚確當又石鼓釋存中亦引其說

蔣衡每得古碑必跋而鑑賞之其臨摹之功不減虛舟吏部手書十三經進呈已選刊石於太學更為稽古之榮

秦伯厓收藏之富甲於關陝藏石刻文有千種俱裝大冊每冊前有石刻八分書大字裝首係其子繼成之者積古齋款識錄其師酉敦蓋銘各一百零八字手拓本

何琦留心金石遊曲阜得孔褒碑于郊外水濱因載歸於廟自題字于碑陰金壽門云琦字禮康居閩中雍正年間人

楊賓著鐵函齋書跋大瓢深於考古其所論列皆有證據

翁嵩年收藏古刻甚富每多題跋

何焯深於考據金石之學時有題跋散見各碑

顧藹吉著隸釋八卷婁機以後續出之碑悉為採掇  
後附碑考二卷碑之存者註今在某處亡者引某  
書云在某處具有引證與婁機字原可以相輔而  
行

萬經著分隸偶存內有漢魏碑考僅二十一種而論  
多詳核

褚峻著金石經眼錄千峯自為摹圖牛階平補說以  
己所親見之碑縮於邊幅而摹勒之共碑四十有  
七斷趺殘碣之形雨蝕苔侵之迹無不在目自有  
金石書以來未有此製千峯實為創體也

牛運震贊成褚千峯成金石經眼錄而為之說復每碑為之贊殊為蛇足後得巴里坤新出裴岑紀功碑改名金石圖下卷益以魏吳以下迄於唐六十圖但於一碑之中約取數十字而具說於其上大不比前刻之精善耳

吳玉搢著金石存十五卷自一至五篆碑自六至十五隸碑共一百二十通俱錄全文惟易篆隸為楷耳考據皆能精博向有鐫本為波臣取去後李雨邨觀察於京師琉璃廠書肆見鈔本題鈍根老人編不知鈍根為何人以金石癖名其書梓之後王述庵司寇又誤語以鈍根老人為博學鴻詞趙搢雨村遂以其書為趙搢作列入函海竟不知出自

山夫先生著述也近李芝齡侍郎重刻金石存於  
浙江學政署徐堅字竹友吳門人與山夫先生友  
善嘗從淮陰市上購得唐唐興寺碑以示山夫錄  
入金石存山夫稱其年少好學嘗從予處見所藏  
篆隸秘本皆手錄以去且精于雋勘丹黃燦然將  
來所詣正未可量也因附錄之

杭世駿著石經考異二卷似未見李野先生書而為  
之者二家詳畧互見亦足補亭林先生所未備而  
更加詳密爾又趙信有石經說以漢石經公羊穀  
梁皆無正經故魏邯鄲淳書春秋正經以補之即  
唐志所云今字石經左傳經也符曾亦有石經說  
以唐石經補刻之字係尹玉羽蓋移石之舉皆出

玉羽力也其說皆有獨得即見考異所引  
厲鷄金石無專著然其考訂每有精核處如杭堇浦  
石經考異考核已極精博而樊榭為之序又引何  
休公羊傳註證漢石經為一字引孔穎達左傳疏  
證魏石經為三字以補其所未及又集中觀廣政  
石經詩景初帳構銅等作俱有考訂不獨以韻語  
見長也

丁敬輯武林金石錄徵君愛金石如性命窮巖絕壁  
手自摹拓證以志乘成此書子傳亦好古有天監  
八年輓跋

金農研考金石刻所藏多異本漢征西大將軍楊瑾  
殘碑十餘字為歐趙洪婁諸書所無壽門獨得之

吳山夫據以錄入金石存又西嶽華山廟碑亦有  
拓本殘缺止十餘字餘或筆畫小損皆可辨認篆  
額六字亦全較勝于郭允伯所藏缺百二十字之  
本亦見金石存

倪濤著六藝之一四百六卷分六集首列金器款識  
石刻文字二集

李光暎輯觀妙齋金石文字考畧十六卷子中上舍  
富而好禮篤嗜墳典金石出所藏碑六百餘種延  
同里金心齋介復佐其輯錄王華村籍渠為之繕  
寫心齋為竹垞太史高弟華村為邁人方伯曾孫  
皆老儒宿學有所師承共采金石之書及地志文  
集說部之類不下百種實開王司寇萃編之先聲

唯辨證絕少意在論碑帖法書而存古人之說耳  
然袁錄之功亦鉅矣其書自是可傳

全祖望著鮚埼亭文集其正集三十七卷後外集三  
十五卷多石刻題跋以石鼓文為必非秦以前物  
不意謝山而出此言也

汪師韓著韓門綴學論金石八條

齊召南有錢武肅王鐵券考畧

姜任修富於收藏漢郭有道碑久無傳本傅青主鄭  
谷口兩先生所摹本多不厭人意於是自賴亦摹  
刻之自謂從寒山趙氏拓本摹得又摹得北海孫  
氏所藏石經殘碑得中郎筆法以吳炳補桐栢碑  
之例重補此碑又袁達曹全諸碑皆有摹本



汪由敦著松泉文集所有碑跋皆能暢達其說

黃華蕃輯恒山石墨考

盧文弨著抱經堂文集其十五十六卷多碑跋

錢大昕著金石跋尾四冊先生學問無一不精到此書在潛研文集之外王亮祿稱其盡掩永叔德父元敬子固亭林竹垞虛舟七家而出其上遂為古今金石學之冠殆非夸語

嚴長明著知白齋金石類籤金石文字跋尾石經考異漢金石例五岳貞珉考五陵金石志平原石蹟表吳興石蹟表等書侍讀以父憂去官尋丁母憂免喪後引疾不出築室三楹顏曰歸求草堂藏書三萬卷金石文字三千卷日吟咏其中後應畢中

丞之招得游太華終南之勝所得金石刻益富子  
觀著金陵石刻記錢竹汀詹事序之稱子進濡染  
家學其於金石刻殆廢寢忘食以求之尤以金陵  
桑梓之地訪而拓之始漢迄元以時代為次錄其  
全文附以考證合一府七縣凡若干種

翁方綱著兩漢金石記二十二卷前列年月表十八  
卷附魏吳石刻八種十九卷隸續補急就章註二  
十卷隸八分考二十一卷補遺末附班馬字類記  
議論堅卓斷制詳明既刻後隨有剗改晚定本尤  
見精核唯間以詩歌附入與歐趙之體又異爾視  
學廣東又著粵東金石畧子樹培著石峯草堂鐘  
鼎考古錢彙考藏有叔丁大林鐘又吳門陸恭富

於收藏有宋拓夏承碑携至京師以眎覃谿先生  
為之考論其本末借臨十日而歸之

王鳴盛著蛾術編百卷其目有十曰說錄說字說地  
說制說人說物說集說刻說通說系蓋仿王伯厚  
顧亭林之意而援引尤為博瞻光祿與錢詹事為  
內兄弟兩人同居燕邸每得一碑輒互出以相品  
隲及先後歸田詹事先成跋尾光祿為之序云未  
暇別成一書後是編成其論金石諸篇博辨固不  
讓於詹事也

汪孟錫著考證金石文二卷

錢載藏晉咸和四年甄乾隆初武康人蔡芳逸於屋  
後培土見一穴極深啟之乃古墓墓有七壙皆甄

甃兩面無字左側有咸和四年八月立七字右側  
無字上側刻是戊二字下側刻一錢有好郭郭外  
復作四出文籀石侍郎得其二汪康古舍人得其  
一形製款識並同侍郎拓其文貽錢竹汀詹事今  
載其事於跋尾又姜實節有吳寶鼎輒跋伊湯安  
前守嘉興時跋孫吳潘儒南墓輒沈大成跋梁天  
監八年輒胡虔記漢萬歲輒江德地跋五鳳三年  
輒

朱筠督學安徽時蒐所部金石遺文得三百餘通成  
安徽金石志三卷精小學釋羊子戈羊為羊謂羊  
不上出且子爵無與姓連稱者是羊子為大夫時  
周文學槩釋為羊謂楚姓今積古齋定羊字

馮浩著孟亭詩文集內有石刻題跋

紀昀學問淵博好金石文字藏周公華鐘銘九十三字其周字甚難識程易疇定為古篆文周字莊進士述祖釋為邾公五等之爵於其國皆稱公也

周春居海昌以進士出宰岑溪歸杜門著書老而彌篤搜羅金石甚富考訂亦精陳默齋騎尉藏古金器有銘大令釋篆文為聶姐姪作安壺六字且審定其物當是嚴仲子為聶政母作也因賦長歌自為注釋

畢宏述與王虛舟蔣湘帆為金石文字交藏古刻甚富作夏承碑考兩漢金石記引其說其碑之真本現為張未未所藏孫星海曾孫梧俱能世其家學

董金甌精篆隸收藏漢碑甚多并古瓦拓本翁氏金石記所錄長樂未央四字橫書瓦即其所藏物又嘗於嵩山搜剔石闕今所傳少室東闕題名十六字前人皆未之見金甌洛陽人仲子菽憲工篆隸尤好金石碑刻罄家購之所得甚夥築友漢堂貯之山陰童二樹游洛陽曾手摹其華山廟雙鉤本即郭允伯本據云此碑之外尚有蔡中郎所書楊震宋拓本真絕代寶也

盛百二精考據以進士出宰山左時濟邑人李東琪得斷碑於州學戟門內大成殿西階下古樹之根驗隸續知是漢膠東令王君廟門碑大令相與訂證為之跋凡得字五十九又半字三十二

藍嘉瑄以濟邑學有鄭固碑中一段久埋地中於乾隆四十三年掘起尺許得六十字又半字五先是雍正六年李鵬於泮池左發得是碑最下一段凡二十字又半字四皆有功於是碑又是年膠州人崔儒眎得故廬江太守范府君碑額於濟邑龍門坊水口今移學宮戟門內

金石學錄卷三

金石學錄卷四

嘉興李遇孫輯

國朝下

畢沅著關中金石記八卷尚書再涖陝西又兩攝蘭  
州之節東各郡邑前後所得金石刻七百九十七  
通始秦漢迄於金元鈎稽經史抉擿異同條舉而  
件繫之以成此書雍涼之奇秀畢萃於是矣撫河  
南輯中州金石記五卷搜採亦極精博撫山左與  
阮雲臺師又同成山左金石志

黃叔璥輯中州金石考八卷為河南開歸道時所輯  
專錄中州諸石刻以各州郡縣編次自商周至元  
明蒐採頗富唯所載金石不註存亡據前人所述



概為錄入亦非紀實之意

劉青藜著續金石錄四卷計跋一百餘首頗有辨證  
武億著授堂金石跋有正跋續跋三跋考訂精博亦  
潛研之流亞也又輯偃師遺文記晉關中侯劉韜  
墓志石今藏其家

王昶著金石萃編百六十卷侍郎弱冠嗜金石及宦  
游所至無不訪求自三代至遼金積千五百通而  
甄錄之其文漫漶見於他書者則為旁註以記其  
全篆隸及見古文別體者摹其點畫加以訓釋凡  
題額碑陰兩側亦必詳載碑制之長短寬博取建  
初慮僞尺度其分寸并志其行字之數諸家題跋  
見於金石諸書文集所載者悉著於編金石之書

至此可謂集大成矣

謝啟昆輯粵西金石畧十五卷自晉至元錄碑四百八十餘種後附銅鼓考又因岷谷榛莽中搜討有所未及或其石已亡而世有拓本作待訪碑目附於末

石韞玉喜蓄古人金石文著獨學廬稿初稿內有石鼓文辨會谿銅柱述二篇二稿內有碑跋三十餘則

孫星衍輯寰宇訪碑錄及六朝金石考觀察少游陝幕與錢獻之洪稚存兩先生佐秋颿制軍成闕中金石記一書切劘有素後致仕歸惟以著書為樂博通淹雅海內宗之平生搜羅三代金器及漢魏

以來石刻不少藏有楚良臣余義鐘七十四字有  
釋文與所藏虜彝四十一字皆為積古齋款識所  
收顧廣圻精考訂之學與觀察交甚契合觀察因  
陶南邨古刻叢編隨得隨鈔難於觀覽欲用時代  
重編屬其校刊之予見三跋皆有考證並識其古  
刻第二行四篆字為淮西道院引夏竦古文四聲  
韻說文八部竄重文院為證甚為精確後延至金  
陵館舍裏校各書李貽德性嗜金石文凡古刻入  
手即博採經史以考證之久館金陵為觀察高弟  
吳修精鑒賞亦與觀察友善所藏金石摹本俱觀  
察為之題識唐處士包公夫人墓誌碑趙晉齋得  
之西溪今藏思亭切偲怡齋

洪亮吉嘗客畢尚書幕佐成闕中中州兩金石記自謂金石之學素寡究心而輿地之嗜幾于成癖每假尚書碑數百通校史傳闕遺其間得史文之誤者十之三以史文正碑石之失者亦十之一又謂金石之失有即可以金石正之者歷舉古碑以證明之又推鄺善長于金石學獨能見其大見所作兩金石記後序

阮宮保元輯積古齋鐘鼎彝器款識與薛氏同其體例而精博過之近時講金石之學者金少而石多吾師此書專以款識名為薛氏後不可缺之書薛尚功所輯共四百九十三器而積古齋有五百六十器之多絕後超前殆無其匹所著擘經室文集

亦多考證金石之文又重摹天一閣所藏北宋本  
石鼓文西嶽華山廟碑又石經儀禮考皆有功於  
金石視學山東時成山左金石志二十四卷撫浙  
時復輯兩浙金石志朱為弼酷嗜古金文字師稱  
其能辨識疑文稽考古籍國邑大夫之名有可補  
經傳所未備者偏旁篆籀之字有可補說文所未  
及者開府兩浙招至節署贊成欸識一書又師輯  
山左金石志引朱朗齋及何夢華為助同事者除  
武虛谷段赤亭顏運生桂未谷李鐵橋俱另見外  
尚有江鳳彝陸繩李伊晉師稱其雅志好古藏獲  
頗富晉任城太守孫夫人碑即江秬香於新泰縣  
張孫莊搜得始傳於世

黃易著小蓬萊閣金石文字秋盦司馬嗜奇好古每  
游一處必訪求古碑之存亡於濟邑州學扶升鄭  
固碑得拓其金石復於嘉祥縣南之紫雲山得敦  
煌長史武班碑及武氏石闕銘遂盡得武氏石室  
所刻畫像又得孔子見老子象及祥瑞圖石刻於  
是移孔子見老子象一石於濟邑州學而萃諸石  
即其地為堂垣砌而堅之榜曰武氏祠堂俾土人  
世守焉厥功甚鉅襄其事者為州人李東琪洪洞  
李克正南明高正炎實同著搜碑之勞云東琪於  
乾隆己酉暮春督工拓碑復得范巨卿殘碑於樵  
星門西壁根不禁狂喜遂移與先得之額並列焉  
爰為之記翁覃谿先生寄李鐵橋兼呈秋庵詩有

任城寶墨熊光起天意助成黃與李之句又父己  
鬲鼎銘二十八字積古齋收入款識即東琪藏物  
也

桂馥著札樸十卷大令學問精到博通經史考據是  
其擅長札樸第八卷論金石文字頗詳審此書大  
令歿後刻於浙江前之碑石題跋見於各書者已  
不少其所藏右軍戈編入積古齋款識

孔繼涵藏有周芋子戈所著微波榘遺書內宋石經  
記一篇幾及三千言考證最詳言石經遷徙變置  
者五其殘缺散佚皆由於此非楊璉取之去也朱  
檢討石經考於刊刻後先字行增損碑數移置廢  
葺未能通核折衷之

顏崇槩博學嗜古收藏宋戴公戈周距末阿武戈等  
器俱編入積古齋款識又藏宋印六孔鉉谷為記  
之其距末不知何器銘八字小篆用金填畫沈心  
醇據戰國策蘇秦說韓王曰谿子少府時力距來  
皆射六百步之外釋此為弩飾

錢大昭為竹汀詹事弟學問淹博著書甚多曾刻可  
廬著述序例一冊其於金石亦有考訂桂未谷所  
藏右軍戈銘十四字先生以篆文奇古非東漢人  
所能及定為秦器說甚詳核子東垣繹伺皆精考  
據東垣著嘉定金石考二卷自元以上皆錄全文  
附以考證又豐宮瓦考見擘經室文集所引繹著  
小廬隨筆亦有校正金石文伺為王述庵司寇所



賞識招至三泖漁莊畀以編校之役萃編之成與有功焉其所釋碧落碑考證精博即載萃編

程瑤田著通藝錄易疇孝廉係欽產精考訂之學著述皆有根柢通藝錄中跋夏承碑一通極詳核又積古齋款識中屢引其說象形句兵周幼衣斧立戈父癸鼎諸器皆有釋文

秦恩復篤嗜古金所藏都公敦曾中盤冊父考盂陽嘉洗孔文父鐘陽泉使者薰壺等器及舊拓款識俱為積古齋所收

沈可培世居嘉興竹林里以進士出宰上高及安肅與兄可均俱留意書畫及金石文字大令著述甚多藏有商父乙解子銘彝亦精考古有寶正輒記

金德輿嗜書畫金石賞鑑精核居桐鄉築桐華館於  
寢廡堂之東偏以儲古物藏平易封宮舉契岳鄂  
王祠銅爵一時題詠甚多又藏賈秋壑所刻鍾太  
傅宣示表原石今歸張叔未家又藏吳越忠懿王  
金塗塢一版可據以正周簪谷朱竹垞兩先生之  
謬同時陳默齋騎尉亦藏錢氏金塗塢四面俱全  
足資考證默齋又藏宗周鐘百二十字與鄂巖之  
舉契皆編入積古齋款識又蕭山祇園寺有周顯  
德舍利塢蔡雲白茂才為之記陳名廣凝蔡名英  
朱楓輯雍州金石記又秦漢瓦圖記古金待問錄  
程敦輯秦漢瓦當文字其所藏舊拓款識皆編入積  
古齋嘗釋王莽時八風壽存當瓦以正朱排山釋

為益壽存富之誤

申兆定陽曲人以孝廉官終白水縣知縣著涵真閣  
漢碑文字跋平生癖于金石到處搜羅善八分手  
摹漢碑數十種將刻石未果

已慰祖歎人少好刻印務窮其學旁及鐘鼎款識秦  
漢石刻遂工隸書故富家中落賣其碑刻尚三千  
金然其愛之彌甚節畚衣食時復買之藏有漢劉  
熊碑雙鈎本凡二百十八字內多洪氏所闕者四  
字少四百十一字并有釋文

汪中江都人自言十四五歲即喜蓄金石文字謨述  
學內外篇孫淵如先生信馬定國之說以石鼓為  
宇文周時物容甫作五證辨其非無不精確所著

漢雁足鐙槃銘釋文又王基碑雲麾將軍碑高府君墓誌諸跋尾皆詳審而考證之藏劉熊碑宋拓本多出巴子籍本者二十八字補洪氏所闕者十三字正其誤者一字東漢射陽畫像石亦藏容甫家海昌俞思謙因近人汪韓門周耕厓皆信馬定國以石鼓為宇文周之物著五可疑以糾正之亦極博辨載孫氏讀書勝錄惟又以為秦文公物凡鼓文中所云天子者俱祝平王之詞未免多此支節予以為石鼓之指為宣王時作在唐人自有相承舊說猶詩之有小序後人臆說皆可廢也

張埴所論古碑皆有考證兩漢金石記屢引其說陳以綱著竹葉碑釋文凡六十餘字兩漢金石記述

之并載其跋以綱海昌人以諸生終遊京師與覃溪先生為金石交

陳鱣精考證之學築果園於硤石山麓藏經籍金石數百種著松研齋隨筆兩漢金石記錄其吳國山碑跋同時海昌之言金石者有陳均能識鍾鼎篆文徧游都門關中江右粵東等省收獲日富築十三漢鏡齋以居徐紹曾為周松霑大令弟子愛石刻日以摩挲古碑為樂藏北宋二體石經周禮殘本實為罕覩松霑大令任岑溪時土人掘山地得銅鼓一面底俱平底有銘古篆陽文人不能識携拓本歸命壽魚考釋得四十字五韻有龍集庚午月建在卯云云共服其博奧許槌亦究心古學吳

山夫金石存李侍郎屬其校而刊之藏有千秋長  
安貽湯萬年二瓦當為孫淵如觀察所未錄

丁杰精考核以漢太學石經稱鴻都石經者誤著辨  
正之兩漢金石記引其論石刻甚多皆有所訂證  
李文藻為錢竹汀詹事主試山東所得士生平愛聚  
書於金石刻搜羅尤富所過學宮寺觀巖洞崖壁  
必停驂周覽有僕劉福壽善推招携紙墨以從有  
所得則盡拓之宰粵東時嘗乘舟出迎制府小憇  
南海廟命僕拓碑秉燭竟夜比曉問制府舟已過  
矣其風致如此見詹事所作李南澗墓志銘又嘗  
手拓廣州光孝寺龔澄樞造鐵塔記及造千佛寶  
塔記以正朱檢討所謂劉鋹所鑄二塔並立一屋

中一作記一題名之誤

李調元著蜀碑記補因王象之輿地碑目所載東南十六路於蜀刻尤加詳細其撫取尚不無挂漏之嫌雨邨補之每卷先以王所得列於前為上卷而以已所得列於後為下卷共合為十卷又於下卷中分王本所未有而增入者曰補王本所已有而釐訂者曰考俱遵國朝郡縣名標之

汪照著古石瑯玕

王復為穀原先生子以考職出為宰受知畢秋颿尚書為作晚晴軒詩序性愛金石令偃師時以邑人武虛谷先有偃師金石遺文錄四卷秋塋續補之廣為十六卷山陰童二如鉅精考據延至幕中相

與訂證引其說頗多其書刊於中州嘉慶庚申修  
嘉興府志時不列於金石類余從鍾映淵敬濤處  
假得始著於錄映淵亦好古士收蓄碑版甚富有  
題跋

陸紹曾擅分隸嗜金石晉瓦券跋頗精核兄超曾藏  
有吉羊洗蔣心餘編修翁覃谿學士程魚門編修  
各紀以詩

江德量以父于九太守名恂者故好金石之文多所  
搜輯幼即世其學所藏舊款識拓本約二十種俱  
編入積古齋書中釋散氏銅盤銘述庵司寇稱其  
精審釋之者又有孔廣森樊明徵汪肇龍吳穎芳  
各有心得



趙秉冲有賜石齋碑錄所藏成都鼎吳彝葛川太子  
廬及款識拓本六十餘種俱收入積古齋書中

段玉裁精研訓詁之學著說文註等書洪氏隸續載  
魏三體石經左傳遺字蓋即洛陽蘇望摹刻本懋  
堂大令諦審之知有尚書大誥呂刑諸篇文錯雜  
其間錢詹事稱為向來考石經者未之聞也然臧  
氏經義雜記中已有此說

邢澍據現在所見唐宋以前金石刻並宋元刊本隸  
釋隸續等書著金石文字辨異十二卷又著西秦  
藝文志八十卷中錄金石甚多又同孫淵如觀察  
作寰宇訪碑錄

吳騫著國山碑考槎客以著述為事經籍金石考訂

必精以饕業在荆谿每往來其間碑在縣境因訪而釋之又著唐開成石經考異蜀石經毛詩殘本考異所著愚谷文存中亦多金石刻跋又著辨以訂孔東塘漢銅尺記周尺考周尺辨之謬

張燕昌著金石契三吳古碑錄又重摹北宋石鼓文著石鼓文釋存文魚居武原篤嗜古金石築石鼓亭於家中一時名公卿咸與之訂交錢竹汀詹事作石鼓亭記以贈之抱經學士作秋帆尚書關中金石記序畧舉國朝為金石之學者十三家起於崑山秀水而終於文魚其推許亦可謂至矣子開福能繼家學著續三吳古碑錄又與文魚賞奇析疑同嗜金石者有吾竹房藏臬伯卣蓋錢柞谿

藏石刻甚富吾名進錢名本誠俱海鹽人

錢坫著十六長樂堂古器款識泮花拜石軒古鏡文  
俱考證精核又習鼎銘釋文乾隆戊戌歲巡撫畢  
公得於長安即屬獻之為釋文共得一百三十二  
字所藏款識拓本十餘種俱收入積古齋書中  
吳東發著石鼓文辨讀釋文等七種又習鼎銘釋文  
侃叔人品高潔貫穿經典而於金石亦癖嗜吳槎  
客稱其好學如楊南仲博雅如劉原父於秦漢碑  
版鐘鼎篆籀靡弗鑽研蒐討旁通曲暢以證之  
溫汝遂篤嗜古金石刻潘有為亦精甄錄皆番禺人  
粵東為金石學者當首推兩君殆歐陽文忠所謂  
好古而有力者予從琅嬛仙館鈔得潘毅堂所藏

古泉目自幣貨以迄時錢有一千三四百品儘多  
異聞罕見者可稱收集之勤矣因述其會粹金石  
而及之亦足以見一斑爾張叔未所藏子執旂句  
兵向為穀堂所藏

江藩究心金石文東明尊銘十九字陳逆簠銘七十  
七字皆有釋文所藏款識拓本皆編入積古齋書  
中嘗藏新莽貨泉范底有母字錢詹事泉母之說  
本此江聲為之記

朱文藻著校訂隸釋存疑及濟邑金石志等書朗齋  
少為述庵司寇所賞識屬其採錄金石諸說以資  
考證後客京師寓韓城王文端公邸第值文端充  
續西清古鑑館總裁得見內府儲藏尊彝古

器摹本三百餘種後又客任城黃小松司馬署得見濟邑一州古今碑拓數百種繼客濟南赴阮雲臺師之招時視學山左徧蒐碑碣得見全省拓本千數百種贊成山左金石志後倦游家居適司寇歸田將訂金石萃編招朗齋與錢君同人襄其役下榻三泖漁莊凡三易稿五易寒暑而始竣事又得見司寇所藏寰宇碑摹一千五百餘種自謂畢生能窺金石之美富殆有天焉

趙魏著蜀石經周禮夏官殘碑考鴈足銓銘考金石題跋散見各書皆簡核可取晉齋少好遠游搜訪古刻藏碑三四千通雖值窮乏寶此不失其所藏款識拓本七十餘種俱編入積古齋款識

陳豫鍾收藏古金款識甚多積古齋錄其拓本二十餘種

段松岑著益都金石志又益都孝廉李廓藏紀侯鐘積古齋編入款識武虛谷金石跋亦載其器而釋之

聶鉞著泰山金石志

瞿中溶為錢詹事壻好金石有唐雞林道經畧使官印記金都統官印記又許宗彥亦有雞林道經畧使印記為雲臺師作

周廣業輯唐石經補考又著客皖錄有都司空瓦考又費士璣有瓦當考因錢既勤釋耕為豐定為成周豐宮瓦引鄭康成大射儀注為證士璣引漢書

地理志新豐縣疑是新豐宮瓦文以備一說又吳晉有長樂萬歲瓦跋

曹秉鈞居禾城號種梅著元延銷跋載兩漢金石記索元延銷即三斗銷向藏嘉興黃大令思堂家後為文後山鼎所得後山精鑑別金石亦能考核得此器後即以三斗銷顏其齋翁覃溪先生為之書扁又兩漢金石記言嘉興姚巽齋江春以元延銷拓本並曹種梅跋來京師始載入記中並云巽齋少年嗜古僑居京師與予次兒樹培往復考核金石文字乃甫歸里而疾卒傷其有志未就因附書於此俾其姓名託茲編以弗湮也因並錄之

朱邦經著南宋石經考嘗司教杭州府學光堯石經

碑明正德十三年直指使宋廷佐由仁和移至郡  
庠現在樞星門內兩廊壁間友崔手拓碑文於每  
碑標題起訖以資考證計存八十六碑並辨明憲  
、聖皇后代書事出於附會

吳文溥輯南野草堂漢唐石刻目錄澹川客關中時  
購得漢唐石刻拓本二百餘通鈔而存其目年月  
州縣誤書人姓氏及文字之全缺無不於目下註  
之殊為清晰

張廷濟住嘉興新篁里鑑賞精博一古金石入手即  
能知其真偽別其原流所藏商周秦漢古彝器銘  
文千種有現今收藏家所未著錄者翁覃溪學士  
與之往復考論多所辨析所藏石刻自石鼓文以



下至宋金亦千種實有數十百年舊拓而其石今已全佚者藏器中鐘鼎尊彝之屬六十餘種絕無偽造其周諸女方爵秦始皇時度則寰宇中所僅有者藏石有唐天寶七載修子產廟殘碑顏魯公元靜先生殘石蘇文忠馬券碑舊石賈秋壑所刻鍾太傅宣示表宋時覆刻淳化殘帖金元刻蘭亭諸石皆精出近時覆刻倍倍金石之外所藏如漢晉古甌秦漢古瓦漢魏至宋元古官私印周秦以來錢幣皆不讓古收藏家其為積古齋款識所收自冊父乙尊以下凡八九器蓋未盡載錄也所著有清儀閣集古款識考金石刻題跋金石奇緣墨林清話等書叔未之兄灝曾登焦山親拓瘞鶴銘

五石共拓為一大幅并拓出爽塏石下有小字四  
行十數字為從前金石家所未道弟沅藏有諸女  
尊祖宰敦二器編入積古齋款識又有永興元年  
堂狼造之洗晉咸和二年甄翁學士為之銘亦佳  
物也從子栴藏有山父壬彝禾季彝犧形爵樂仲  
洗大吉羊洗龍虎鹿轆鐙等器一門羣從無不以  
金石名學又葛嵩藏有商父乙觚周華姬鼎遣小  
子敦漢宜子鎗吳越寶正甄等物王幾藏有周史  
頌盤王銘壽藏有漢嚴氏洗此皆古彝器之現存  
其家與叔未弟弟稱金石交朝夕切磋互相訂證  
今其人或存或亡而備錄之以見此鄉多好古之  
士焉

宋徐淳山右孝廉號芝山為翁覃谿學士門下士篤嗜金石老而流寓吳越間東南好古之士無不與之相契所藏古金石刻之至精者皆為張叔未所得

黃錫蕃居海鹽擅分隸亦精於蒐討嘗集諸家散氏盤銘釋文折衷己說彙成一冊所藏款識裝界十鉅冊曾於張叔未案頭見之今為上海陳寄磻所得著續古印式二卷金石表六卷刻碑姓氏錄一卷

陳鴻壽輯續金石萃編鈕匪石與之同輯丙子冬間晤曼生悉己得八卷今曼生已亡其書未刻匪石名樹玉曾著說文新附考錢詹事序而刊之

嚴可均著唐石經校文

張鑑居湖州南潯鎮精於考古為劉阮二宮保師所深器嘗著墨妙亭碑目考及古甃記等書其碑目考自序畧云孫公墨妙亭石刻迄今七百載而石與拓本存者絕少余以聞見所及疏而出之有鄭氏莖畦所未知者然亦十纔得其六七耳異日苟有能發府治之沮洳而復樹之則斯錄之逸者存闕者補邑之幸非即此書之幸歟

徐熊飛博雅好古每得武康山中古甃以考核之游焦山手拓無專鼎銘九十四字以歸雲臺師取以編款識

李富孫釋漢唐石經異文及北宋周禮殘碑援據精

金四  
確又嘗仿王止仲例以洪氏隸釋隸續所載益以  
六朝人碑製為漢魏六朝墓銘纂例阮雲臺師見  
之謂碑碣當以漢魏為法六朝猶不失遺意屬其  
將原文及碑式跌寸並為載入俾古制有所考又  
郭麐著金石例補一卷汪選樓序之

何元錫嗜金石收弄亦多游山左於聖林牆外得孔  
君墓碣移置廟內雲臺師為記之又以漢刻公乘  
伯喬題名殘碑貞女龍鳳墓闕永初官塹文三種  
重摹勒石真於南昌儒學齋廡原刻為趙晉齋所  
藏今為張叔未購得

翁廣平著金石集錄海邨居吳江之平望鎮博雅好  
古所跋金石刻各種皆有典據

嚴杰著重撫天一閣北宋石鼓文考宋高宗石經考  
厚民究心古學為雲臺師所賞識久館節署十三  
經校勘記等書皆面承指示而助成之又趙春沂  
亦有天一閣石鼓考孫同元有宋高宗御書石經  
考金廷棟著石經穀梁傳考洪震煊著西漢陶陵  
鼎考俱見詁經精舍文集

汪家禧攻苦力學長七畧之學辨析古籍無豪髮爽  
於金石亦篤嗜而審核之今所存者惟西嶽華山  
碑考一篇刻之東里生爐餘集中

錢泳工分隸攀雲閣帖臨漢隸四十餘種近更縮臨  
唐碑亦不下百種廣陵鮑氏刊之其致力於金石  
者深矣又嘗以論語孝經大學中庸分書刻石嵌

於蘇州府學壁間

司馬宣居金陵好古多藏有東彝琕戈陽武劍諸物收入積古齋款識其琕字程易疇據周公華鐘銘周字比例推詳定為琕之省文

李聘工分隸頗研心金石之學僑寓武原時與張文魚徵君游獲其緒論嘗藏漢少室石闕畫象吳槎客為之跋今歸張叔未又從海濱得五鳳三年甄贈雲臺師携至京師翁覃谿先生見之為作五鳳三年甄考又藏大吉羊宜用洗載入文魚所著金石契中後歸梅里所藏諸物漸散去無存所著有漢碑奇字漢隸解與等書

戴允曾酷嗜舊碑法帖遇有精本搜採前人題跋語

而折衷已說書於後嘗藏郭有道碑係木中褚氏  
於乾隆四年翻刻之元本褚氏藏此碑已百餘年  
實為宋拓色澤甚古筆法變化不測非傳青主鄭  
谷口姜自耘臨摹之本所能彷彿松門購得之矜  
祕不輕示人余往禾城必到從好齋中縱觀古刻  
不忍釋手不料辛巳秋間後一病不起老友云亡  
傷如之何因輯金石學錄而附其姓氏為之泣然  
斌良著壽金庵金石款識己卯庚辰間任江蘇糧儲  
道余與張叔未孝廉游虞山之便往訪署齋出示  
所藏銅器二百餘件摩挲終日目不暇給為之定  
真贋辨文字其收藏可謂富矣藏有光和二 years 量  
邊款九十餘字底同側有陽安二隸書為金器中



絕品又素方伯訥收獲彝器甚富藏有叔氏大林鐘與翁宜泉所藏者同文惟氏字明顯不比翁鐘字已剝蝕所以著錄者誤為丁字也所藏尊彝等尚有十餘事

馮登府著漢魏蜀石經補考以辨古今文之異同唐石經補考以正亭林先生某字誤之非俱有疏證辨論極精當又集古彝器及甗瓦遺文拓本為金屑石餘二錄考證古今多所發明

鍾振富居桐鄉濮院鎮性愛漢唐碑碣廣為搜羅不下千種並金器款識皆精裝求名手書簽以時展玩繪秋夜校碑圖題詠甚多趙晉齋張叔未嘗造其廬各出古刻以相質證游吳門購得林同人所

藏漢魏碑十冊計十六種內有方印云閩中林侗  
手校補並裝於三原學古堂頁版俱同人手書碑  
目摹刻於上精妙絕倫岳洙傳久館於其家同嗜  
碑刻著有石刻攷畧後附漢碑讀字

馬鎡居海昌傘墅村擅飛白隸書收古石刻能審度  
而辨定之所藏古泉不下二千品有極精者游武  
林購得大泉五十範一枚背有利主事取工主所  
予八字陽文隸書精湛異常於泉范中稱絕品焉  
馬陳朝著續石經考聚諸家之說薈萃成編加案語  
以補其缺而正其非頗費搜錄之勤

劉喜海為文恭公師長子幼愛金石所居書室款識  
石刻縱橫滿几近便尋碑碣之未為萃編所收者

意欲續之搜羅漸廣必有成書也又葉志詵同居京師與燕亭嗜金石亦同所藏款識及漢印甚富阮亨著瀛舟筆譚內錄金石文三卷

陳經著求古精舍金石圖四卷前摹金器圖縮本頗精工並及刀布鑑印剛卯之屬後摹古甄款識圖同時丁曉樓王二樵鈕葦村各藏漢晉古甄數十種俱有拓本流傳丁名萬模王名獻鈕名重熙徐同栢為張叔未孝廉之甥好古能識奇字叔未每得款識之難辨者屬其細意融會即豁然通解著崇古堂古金考古履仁鄉金石文字記

錢玫著上虞金石考錢既勤令上虞保舉應孝廉方正徵稱其書搜羅頗富考證亦精

周中孚嘗以漢學受知於雲臺師著述甚富以隱修  
經業署印著金石識小錄及杭嘉湖道古甄目  
龔自珍仁和閤齋觀察之子著述甚富旁及金石文  
字藏弄八百餘種皆世所不經見惜燬于火

徐渭仁通金石之學搜采漢唐諸刻補王氏萃編所  
闕者若干卷兼工篆隸李筠嘉有慈雲樓藏書數  
萬卷金石文字千餘種輯藏書志及金石目梅益  
徵精於鑑別所搜古石刻足與徐氏相伯仲嘗下  
榻慈雲樓佐輯金石目等書紀大復著古甄品又  
工篆刻及漢隸俱上海人

陳璜吳人僑居上海癖嗜金石收集鐘鼎款識及漢  
唐碑版漢晉古甄同貯一室名曰澤古齋著有古

輒錄足補歐趙之闕近延武原黃叔升張質明兩  
君同輯金石萃編補遺金石萃編校勘記續金石  
萃編夏世堂建安諸生幼隨父宦於上海嘗集漢  
唐石刻補王氏萃編之闕

馮雲鵠江南通州人官膠州知州刻有續金石圖於  
山左諸石刻搜採更備

姚觀光能文嗜古搜羅書畫金石甚富藏有夔作尊  
寶彝敦子牙爵子孫作婦姑簪彝甗等器築墨林  
如意之室以貯諸古物蓋六榆先得天籟閣所製  
鐵如意一柄銘辭二十四字極精好張叔未孝廉  
為隸書扁以顏之石刻中藏唐刻石拓黃庭經一  
本有王覺斯孫退谷何義門諸跋是宋思陵內府

物黃庭傳本無出其右向為吾里杜氏所藏後歸  
當湖錢夢廬今為六榆購得夢廬名天樹賞鑑書  
畫外金石亦究心焉

金石學錄卷四